

Memorandum o saradnji
u oblasti obuke i usavršavanja državnih službenika
u organima državne službe u Federaciji BiH

Ovaj Memorandum o razumijevanju se zaključuje između:

Agencije za državnu službu Federacije BiH (u daljnjem tekstu „Agencija“),
koju predstavlja direktor mr.sc. Sead Maslo,

i

Centra za promociju civilnog društva (u daljnjem tekstu „CPCD“),
kojeg predstavlja direktorica Aida Daguda,

u daljnjem tekstu „Potpisnici“

Realizujući svoju misiju i osnovne ciljeve svog djelovanja i uzajamno uvažavajući različite ali komplementarne uloge i odgovornosti,

promovišući i podržavajući razvoj stabilne i profesionalne državne uprave u Federaciji BiH koja je u stanju pružati kvalitetne usluge građanima,

podržavajući uspostavljanje i razvoj konstruktivnog dijaloga i saradnje između organa vlasti i civilnog društva u Federaciji BiH u skladu sa osnovnim vrijednostima i principima utvrđenim u Sporazumu o saradnji Vijeća ministara BiH i NVO sektora u BiH usvojenog i potpisanog 2007. godine,

Potpisnici su utvrdili tekst ovog Memoranduma o razumijevanju (u daljnjem tekstu „Memorandum“) o ostvarivanju saradnje u oblasti obuke i usavršavanja državnih službenika u organima državne službe u Federaciji BiH i dogovorili kako slijedi:

Cilj i svrha Memoranduma

- (1) Sveukupni cilj ovog Memoranduma je doprinos razvoju profesionalne i efikasne državne službe u Federaciji BiH.
- (2) Osnovna svrha Memoranduma je uspostavljanje i razvoj saradnje u oblasti obuke i usavršavanja državnih službenika u organima državne službe u FBiH. Ovaj Memorandum utvrđuje osnovne standarde, obim i područje buduće saradnje, te međusobne uloge i obaveze Potpisnika.
- (3) Ovim Memorandumom Potpisnici žele promovirati ideju da obuka o konceptu i praksi civilnog društva u BiH uskoro bude uvrštena i u zvanične operativne planove Agencije kao jedna od tema obuke za državne službenike u organima državne službe u FBiH. Potpisnici dijele zajedničko uvjerenje da bi to doprinijelo razvoju bolje saradnje između institucija vlasti i civilnog društva u FBiH, te pružanju još kvalitetnijih usluga građanima.

Predmet saradnje

- (4) Predmet saradnje po osnovu ovog Memoranduma obuhvata sljedeće modalitete:
 - a) Obuka i usavršavanje državnih službenika u oblasti razumijevanja koncepta i prakse civilnog društva u BiH, uključujući promociju i razvoj institucionalnog dijaloga i saradnje između vlasti i civilnog društva na svim nivoima vlasti u FBiH.
 - b) Razmjena informacija, stručne literature i drugih resursa od značaja za ostvarivanje osnovnog cilja i svrhe ovog Memoranduma;

- c) Zajedničko planiranje kampanja prikupljanja dodatnih, vanbudžetskih sredstava za finansiranje obuke državnih službenika kod stranih međunarodnih, vladinih i nevladinih donatorskih organizacija i agencija;
 - d) Razmjena i proširenje mreže domaćih trenera i predavača te naučnih i stručnih institucija specijalizovanih za pojedine teme obuke od interesa za Potpisnike;
 - e) Zajedničko učešće, kad god to bude moguće, predstavnika Agencije i CPCD na domaćim i međunarodnim skupovima posvećenim promociji i izgradnji kapaciteta predstavnika vlasti i civilnog društva za razvoj obostrano korisnog dijaloga i saradnje;
- (5) Predmetom ovog Memoranduma mogu biti i drugi oblici saradnje u oblastima od zajedničkog interesa koje dogovore Potpisnici, a što će se regulisati aneksima Memoranduma.

Način realizacije saradnje

- (6) Obuka i usavršavanje državnih službenika zasnivat će se u duhu partnerske saradnje, u skladu sa najvišim profesionalnim standardima, te u skladu sa važećim zakonskim, podzakonskim i normativnim aktima Agencije koji regulišu način realizacije obuke i razvoj državnih službenika.
- (7) Donatorska sredstva koja budu prikupljena kroz partnerske projekte, Potpisnici će koristiti za organizaciju i pružanje zajednički dogovorenih obuka, u skladu sa uslovima iz ugovora o donaciji.

Prelazne i završne odredbe

- (8) Ovaj Memorandum nije ugovor i stoga ne uspostavlja bilo kakve pravne obaveze za Potpisnike. Njegova namjera je da pruži osnovu za saradnju u oblastima opisanim u prethodnom tekstu.
- (9) Memorandum stupa na snagu danom njegovog potpisivanja. Saradnja na osnovu ovog Memoranduma trajat će onoliko dugo koliko Potpisnici budu smatrali da je to u njihovom obostranom interesu.
- (10) Memorandum može prestati važiti na zahtjev svakog od Potpisnika, uz prethodnu pismenu najavu sa kratkim obrazloženjem razloga za takvu odluku.
- (11) Svaki nesporazum i/ili spor koji nastane u vezi sa tumačenjem bilo koje odredbe ovog Memoranduma, Potpisnici će rješavati dogovorno, na prijateljski način.
- (12) Ovaj Memorandum je potpisan u 2 (dva) istovjetna primjerka, gdje svaki potpisnik zadržava po 1 (jedan) primjerak.

Potpisano u Sarajevu, dana 20.02.2013. godine

Za Agenciju za državnu službu FBiH

mr.sc. Sead Maslo, direktor

1 Broj: 0134-7-87/13

Za Centar za promociju civilnog društva

Aida Daguda, direktorica